



SEBAHAGIAN pelajar Malaysia yang terkandas di Yemen tiba di tanah air menerusi pesawat sewaan khas Egypt Air semalam.

131 pelajar terkandas di Yemen selamat tiba

PUTRAJAYA – Kumpulan pertama rakyat Malaysia seramai 131 orang yang dilaporkan terkandas di Yemen sejak Mac lepas susulan pandemik Covid-19, selamat tiba di Lapangan Terbang Antarabangsa Kuala Lumpur (KLIA), Sepang dengan pesawat sewaan khas Egypt Air pada pukul 8.34 pagi semalam.

Timbalan Menteri Luar, Datuk Kamarudin Jaffar berkata, kumpulan kedua seramai 17 orang pula dijadual tiba hari ini pada pukul 12.55 tengah malam melalui penerbangan komersial Emirates.

Katanya, perjalanan kesemua 148 rakyat Malaysia tersebut bermula semalam dengan penerbangan dari Seiyoun, Yemen ke Kaherah, Mesir sebelum meneruskan perjalanan dengan dua penerbangan berasingan ke Malaysia.

“Rakyat Malaysia dari Ye-

men ini terdiri daripada pelajar persendirian yang telah menyatakan hasrat untuk pulang ekoran penularan pandemik Covid-19 serta pelajar yang telah tamat pengajian,” katanya dalam satu kenyataan di sini semalam.

Kamarudin, yang juga Pengerusi Pasukan Petugas Covid-19 Kementerian Luar berkata, sebelum ini beberapa rancangan repatriasi oleh Kerajaan Malaysia untuk membawa pulang kumpulan pelajar itu terpaksa ditunda atas sebab isu-isu logistik yang tidak dapat dielakkan.

“Pembukaan semula lapangan terbang dan penyambungan operasi penerbangan komersial oleh kerajaan Yemen membolehkan penerbangan sewaan khas repatriasi ini dilaksanakan.

“Kos repatriasi ini dibiayai secara bersama antara Kerajaan Malaysia dengan penumpang yang rata-rata pelajar daripada

keluarga yang kurang berkemampuan,” katanya.

Beliau memberitahu, kesemua rakyat Malaysia yang tiba akan menjalani ujian saringan Covid-19 setibanya di KLIA dan seterusnya dibawa menjalani proses kuarantin di stesen kuarantin yang ditetapkan oleh kerajaan untuk pemantauan lanjut.

Kamarudin berkata, Wisma Putra merakamkan penghargaan kepada kerajaan Yemen dan Kedutaan Besar Malaysia di Muscat, Oman yang membantu dalam usaha kepulangan rakyat Malaysia itu ke tanah air.

Ujarnya, Wisma Putra melalui Perwakilan-Perwakilan Malaysia di luar negara akan meneruskan pemantauan situasi semasa serta bekerjasama dengan pihak berkuasa tempatan dalam usaha memberi bantuan sewajarnya kepada rakyat Malaysia yang masih berada di luar negara.